



Här Claude Wiseler
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 21. Abrëll 2026

Här President,

esou wéi d'Chambersreglement et virgesäit, bieden ech Iech, dës parlamentaresch Fro un den Här Staatsminister, d'Madamm Minister fir Gesondheet a sozial Sécherheet an den Här Kulturminister weiderzeleeden.

An der Äntwert op déi parlamentaresch Fro Nummer 3761 schreift d'Madamm Minister fir Gesondheet a sozial Sécherheet, op d'Fro, firwat standardiséiert Bréiwer zwar zum Deel an net administrative Sprooche wéi Portugisesch an Englesch, awer net an eiser Nationalsprooch Lëtzebuergesch redigéiert sinn, dat hei: *“De Ministère fir Gesondheet a sozial Sécherheet versicht bei senger Preventiounsmoosname souwéi och bei den Terminconvocatiounen déi Sproochen ze benotzen, déi vun engem méiglechst groussen Prozentsaz vun der Bevëlkerung verstanen ginn. Mam Ofdecke vun den uewe genannte Sprooche gëtt dovun ausgaangen dass e groussen Undeel u Persounen (dorënner och lëtzebuergeschsproocheg Persounen, awer och Persounen déi d'lëtzebuergesch Sprooch net beherrschen) d'Kommunikatioun versteet”*.

Et muss awer all Bierger sech un all Ministère adresséiere kënnen, deementspreechend wier et nëmme konsequent, d'Wiel vun de Sproochen interministeriell ze standardiséieren. Des Weidere kënnt d'Nofro no méi Visibilitéit vum Lëtzebuergesch dacks och grad vun auslännesche Matbierger, déi bedauern, datt eis Nationalsprooch am öffentlechen Raum quasi net virkënnt, wat et fir si nach méi schwéier mécht, se ze léieren.

An deem Sënn géif ech der Regierung gär dës Froe stellen:

- 1) Wéi begrënnt d'Regierung d'Decisioun, op eng allgemeng, interministeriell Reegelung fir déi schrëftlech Kommunikatioun mat de Bierger ze verzichten?
- 2) Kann d'Regierung eng Tabell presentéieren, déi regruppéiert a begrënnt firwat wat fir ee Ministère a wéi eng entspreechend Verwaltungen an öffentlech Institutiounen, wéi eng automatiséiert Bréiwer a wéi enge Sprooche verschécken?
- 3) D'Sproochegesetz vun 1984 gesäit vir, datt de Bierger d'Wiel huet an enger vun eisen dräi administrative Sprooche mam Staat ze kommunizéieren. Wier et an deem Sënn net méi effizient, standardiséiert Bréiwer grondsätzlech a systematesch an deenen dräi Sproochen ze verschécken?
- 4) De Recours op déi portugisesch Sprooch an der Kommunikatioun vum Gesondheitsministère gouf mat der Erreechbarkeet vun enger méiglechst héijer Zuel vu Bierger begrënnt. Firwat ginn d'Bréiwer dann net och op Spuenesch, Italieenesch asw. verschéckt? Wëll d'Madamm Gesondheitsminister domat ausdrécken, datt eis portugisesch Matbierger sech am Géigesaz zu anere mat deenen dräi Sproochen Däitsch, Englesch a Franséisch besonnesch schwéier dinn? Leien der Regierung Zuele vir, wéi vill Leit zu Lëtzebuerg just Portugisesch schwätzen?

- 5) Steet déi Äntwert net am Widdersproch zu der Ausso vun der Regierung, datt sou vill Lëtzebuerger geschwat géif, wéi nach ni?
- 6) Gesäit d'Regierung am Benotze vun net administrative Sproocher bei gläichzäitegem Verzicht op d'Lëtzebuerger net eng seriö Benodeelegung vun de Lëtzebuerger an der Lëtzebuerger Sprooch? Wéi verdréit déi Praxis sech mat eiser Legislatioun iwwert d'Diskriminatiounsverbuert?

Mat déiwem Respekt,



Alexandra Schoos
Deputéiert